

植物名實圖考長編

十八

植物名實圖考長編卷之十一

固始吳其濬著

蒙自陸應穀校刊

芳草

蘭草

芎藭

薜荔

白芷

蛇牀子

杜若

青木香

澤蘭

當歸

杜當歸

芍藥

附

王觀芍藥譜序

劉攽芍藥譜序

牡丹

附

歐陽修牡丹記

周氏牡丹記

陸游牡丹譜

胡元質牡丹譜

薛鳳翔牡丹八書

亳州牡丹史

蘭草

本草經蘭草味辛平主利水道殺蠱毒辟不祥久服益氣輕身不老通神明一名水香

詩經方秉蘭兮陸璣疏蘭卽蘭香草也春秋傳刈蘭而卒楚詞云紉秋蘭以爲佩孔子曰蘭當爲王者香草皆是也其莖葉似藥草澤蘭但廣而長節節中赤高四五尺漢諸池苑及許昌宮中皆種之可著粉中故天子賜諸侯蒞蘭藏衣著書中辟白魚也

別錄無毒除胃中痰癖生大吳池澤四月五月採陶隱居云方

藥俗人並不復識用大吳卽應是吳國爾太伯所居故呼大吳
今東門有煎澤草名蘭香亦或是此也生濕地李云是今人所
種似都梁香草

唐本草註云此是蘭澤香草也八月花白人間多種之以飾庭
池溪水澗傍往往亦有陶云不識又言煎澤草或稱李云都梁
香近之終非的識也

別本註云葉似馬蘭故名蘭草俗呼爲薺尾香時人皆煮水以
浴療風故又名香水蘭陶云煎澤草唐註云蘭澤香皆非也

蜀本草圖經云葉似澤蘭尖長有歧花紅白色而香生下濕地

本草拾遺蘭草與澤蘭二物同名陶公竟不能知蘇亦強有分別按蘭草本功外主惡氣香澤可作膏塗髮生澤畔葉光潤根小紫五月六月採陰乾婦人和油澤頭故云蘭澤李云都梁是也蘇註蘭草云八月花白人多種於庭池此卽澤蘭非蘭草也澤蘭葉尖微有毛不光潤方莖紫節初採微辛乾亦辛入產後補虛用之已別出中品之下蘇乃將澤蘭註於蘭草之中殊誤廣志云都梁香出淮南亦名煎澤草盛宏之荊州記曰都梁縣有山山下有水清淺其中生蘭草因名爲都梁亦因山爲號也本草綱目李時珍曰蘭草澤蘭一類二種也俱生水旁下濕處

二月宿根生苗成叢紫莖素枝赤節綠葉葉對節生有細齒但以莖圓節長葉光有歧者爲蘭莖微方節短而葉有毛者爲澤蘭高者三四尺開花成穗如雞蘇紅白色中有細子雷敷炮灸論所謂大澤蘭卽蘭草也小澤蘭卽澤蘭也禮記佩帨蘭茝楚詞紉秋蘭以爲佩西京雜記載漢時池苑種蘭以降神或雜粉藏衣書中辟蠹者皆此二蘭也今吳人蒔之呼爲香草夏月刈取以酒油灑制纏作把子貨爲頭澤佩帶與別錄所出大吳之文正相符合諸家不知二蘭乃一物二種但功用有氣血之分故無定指或云家蒔者爲蘭草野生者爲澤蘭亦通

通志蘭卽蕙蕙卽薰薰卽零陵香楚辭云滋蘭九畹植蕙百畝
互言也古方謂之薰草故名醫別錄出薰草條近方謂之零陵
香故開寶本草出零陵香條神農本草經謂之蘭臣昔修本草以
二條貫於蘭後明一物也臣謹按蘭舊名煎澤草婦人和油澤
頭故以名焉南越志零陵香一名燕草又名薰草卽香草生零
陵山谷今湖嶺諸州皆有又別錄云薰草一名蕙草明蕙薰之
爲蘭也以其質香故可以爲膏澤可以塗宮室近世一種草如
茅葉而嫩其根謂之土續斷其花馥郁故得蘭名誤爲人所賦
咏

謝翫楚辭芳草譜離騷云滋蘭九畹又云光風轉蕙汜崇蘭蘭草大都似澤蘭其香可著衣帶者是素問云治之以蘭除陳氣也皆概指香草可見

遯齋閒覽楚辭所詠之蘭或以爲都梁香或以爲澤蘭或以爲猗蘭草今當以澤蘭爲正山中又有一種如大葉麥門冬春開花極香此則名幽蘭非眞蘭也

楚辭辨證蘭蕙二物本草言之甚詳劉次莊云今沅澧所生花在春則黃不若秋紫之芬馥又黃魯直云一榦一花而香有餘者蘭一榦數花而香不足者蕙今按本草所言之蘭雖未之識

然而云似澤蘭則今處處有之蕙則自爲零陵香尤不難識其
與人家所種葉類茅而花有二種如黃說者皆不相似大抵古
之所謂香草必其花葉皆香而燥濕不變故可刈而爲佩若今
之所謂蘭蕙則其花雖香而葉乃無氣其香雖美而質弱易萎
皆非可刈而佩者也

廣雅疏證蘭蘭也鄭風溱洧篇方秉蘭兮陳風澤陂篇有蒲與
蘭傳並云蘭蘭也神農本草云蘭草主殺蠱毒辟不祥通神明
案鄭風正義引義疏云蘭卽蘭香草也莖葉似澤蘭廣而長節
藏衣著書中辟白魚是其殺蠱毒也初學記引韓詩章句云鄭

國之俗三月上巳於溱洧兩水之上招魂續魄秉蘭拂除不祥之故周宮女巫掌歲時祓除釁浴注云歲時祓除如今三月上巳如水上之類釁浴謂以香薰草藥沐浴夏小正蓄蘭傳云爲沐浴也楚詞九歌浴蘭湯兮沐芳王逸注云言已將脩饗祭以事雲神乃使靈巫先浴蘭湯沐香芷以自潔清也是其辟不祥通神明也蘭或爲蕺蘭或爲蓮衆經音義卷二引字書云蕺與蘭同蕺蘭也又引說文云蕺香草也卷十二引聲類云蕺蘭也又引說文云香草也今本說文蕺草出吳林山脫去香字耳廣韻蕺香草卽本說文中山經云吳林之山多蘭草青要之山有

草焉其狀如薺其本如藁本洞庭之山其草多薺蘼蕪芍藥芎
藭以薺與藁本蘼蕪芍藥芎藭並言之其爲香草明矣郭璞以
薺爲菅云似茅恐非也說文芎藭蘭薺四字連文別出茅菅二
字於後則薺與蘭同不與菅同矣是菅通作薺也管子地員篇
五粟之土五臭生之薺荔白芷蘼蕪椒蓮五沃之土五臭疇生
蓮與蘼蕪藁本白芷是蘭通作蓮也詩溱洧釋文引韓詩蘭蓮
也御覽引韓詩章句云蘭蘭也初學記引韓詩章句云秉蘭拂
除不祥之故皆借蓮爲蘭澤陂箋云蘭當爲蓮芙蕖實也云當
爲蓮而不云蘭蓮也則以蘭之本字不訓爲蓮藕之蓮故必破

字耳

說文解字注蘭香草也易曰其臭如蘭左傳曰蘭有國香說者謂似澤蘭也从艸闌聲落干切十四部

焦循毛詩補疏方秉苕兮傳苕蘭也循按漢書地理志引詩云方秉菅兮顏師古注云菅蘭也一切經音義引聲類云蕝蘭也

又說文云蕝香草也出吳林山

今說文本缺香字

山海經中山經吳林

之山其中多蕝草郭璞注云蕝亦菅字蕝苕字同菅其假借也太平御覽引韓詩傳云三月桃花水下之時士與女方秉蘭兮秉執也當此盛流之時衆士與衆女方執蘭而拂除又後漢書

注引薛君韓詩章句云鄭國之俗三月上巳之溱洧兩水之上
招魂續魄秉蘭草祓除不祥故詩人願與所悅者俱往也韓詩
直以秉蘭爲秉蘭與毛不異釋文引韓詩云蓮也此當爲陳風
有蒲與蒿之注陸德明誤載於此

芎藭

本草經芎藭味辛溫主中風入腦頭痛寒痺筋攣緩急金瘡婦人血閉無子

別錄無毒主除腦中冷動面上遊風去來目淚出多涕唾忽忽如醉諸寒冷氣心腹堅痛中惡卒急腫痛溫中內寒一名胡窮一名香果其葉名薜蘿生武功川谷斜谷西嶺三月四月採根暴乾陶隱居云今惟出歷陽節大莖細狀如馬銜謂之馬銜芎藭蜀中亦有而細人患齒根血出者含之多差苗名薜蘿亦入藥別在下說俗方多用道家時須耳胡居士云武功去長安二

百里正長安西與扶風狄道相近斜谷是長安西嶺下去長安一百八十里山連接七百里

圖經芎藭生武功川谷斜谷西嶺蘼蕪芎藭苗也生雍州川澤及宛句今關陝蜀川江東多有之而以蜀川者爲勝其苗四五月間生葉似芹胡荽蛇牀輩作叢而莖細淮南子所謂夫亂人者若芎藭之與藁本蛇床之與蘼蕪是也其葉倍香或蒔於園庭則芬馨滿徑江東蜀川人採其葉作飲香云可以止泄瀉七八月開白花根堅瘦黃黑色三月四月採暴乾一云九月十月採爲佳三月四月非時也關中出者俗呼爲京芎並通用惟貴